



UKA 2015/94
13. november 2015
Ane Hansen

Eqqagassat pillugit nalunaarusiap nalilersorneqaqqinnissaa pillugu Naalakkersuisunut inassuteqaateqarnissamik Inatsisartunut aalajangiiffigisassatut siunnersuut, tamatumani kommunit inuit tamat ingerlaarfiini illoqarfinni nunaqarfinnilu sumiiffinni cigaretsit sinnikuinut eqqaavisanik matoqqasunik ikkussuinissaanik peqqussuteqarnissaq pillugu siunnersuut.

(Inatsisartunut ilaasortaq Juliane Henningsen, Inuit Ataqatigiit)

Nunatta saligaattuunissaa pillugu inersimasut naliginnaasumik meeqqanut maligassiuissusssatut isigineqarnissarput pingaartittarparput taamaattariaqarporlumi. Inuillu pujortartartut taamatut imminnut isigisarsimagunangilaat, amerlavallaaqaat pujortarsinnarlutik pujortakkamik kimmivikuanik maangaannaq igitsinissamut pisinnaatitaaffeqarasugisartunik. Tamanna takussutissarpassuaqartarpoq ukiut tamaasa illoqarfinni nunaqarfinnilu saliinermi kimmivikut amerlalluinnartut katersoruminaatsullu katersorneqartarmata.

Kimmivikut pingortitami annertuumik mingutsitsisartut ilisimatusarnerit arlallit takutererpaat, taamaammatt pujortartartut akisussaaffeqarnerullutik maangaannaq kimmivikunik igitsinaveersaarnissartik pingaartittariaqarpaat. Inatsisartuni ilaasortaasimasup Juliane Henningsen-ip siunnersuuteqarneratigut pisortat illuutaanni silataannilu pujortarnermik inerteqquteqarnermi inatsisiliortoqarnikuuvoq tamanna ajunngilluinnarpoq ineriartortittariaqarlunilu.

Pujortarnermi inerteqquteqarnermi pisortat illuutaanni illuaqqat pujortartarfiit assigisaallu kinguneqarluartumik pilersiororneqarsimapput. Taamaakkaluartoq sulii pujortartartut maangaannaq kimmivikunik eqqaavallaaqat. Pujortartulli sinnikui ikuallattoornissamut aamma ulorianaateqarsinnaasarpud tamannalumi aamma ikuallattoornernik ikigisassaannigitsunik pilersitsisareerpoq. Tamanna pillugu inatsisiliat malitsigisaannik nalunaarusiatigut sulii sukaterinissaq pisariaqarluinnarpoq.

Siunnersuuteqartorlu isumaqatigilluinnarparput eqqagassat pillugit nalunaarusiap nalilersorneqaqqinnissaa pisariaqartoq, tamatumani kommunit inuit tamat ingerlaarfiini illoqarfinni nunaqarfinnilu sumiiffinni cigaretsit sinnikuinut eqqaavissanik matoqqasunik ikkussuinissamik peqquteqartariaqarlutik.

Taamatut oqaaseqqarluta siunnersuutigineqartoq isumaqatigaarput, siunnersuutillu aappassaaneerreqannginnerani Inatsisartut avatangiisinut ataatsimiisitaliani nalilersorluarneqassasoq inassutigalugu.